



Broj: 01- /26
Sarajevo: 15. 1. 2026. godine

PREDSTAVNIČKI DOM
PARLAMENTARNE SKUPŠTINE BOSNE I HERCEGOVINE
n/r predsjedavajućeg

Šemsudin Mehmedović

BOSNA I HERCEGOVINA PARLAMENTARNA SKUPŠTINA BOSNE I HERCEGOVINE SARAJEVO			
PRIMLJENO: 15-01-2026			
Organizaciona odlučka	Klasifikaciona oznaka	Redni broj	Broj priloga
01-	10-1-	219/	26

DOSTAVITI: Uredu visokog predstavnika u Bosni i Hercegovini, zastupničko pitanje

U skladu s čl. 166. stav (3) i 170. stav (1) Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19, 53/22, 59/23, 87/23, 50/24 i 56/25) postavljam sljedeće

ZASTUPNIČKO PITANJE

Da li visoki predstavnik u Bosni i Hercegovini gospodin Christian Schmidt, u skladu sa svojim ovlastima datim članom V. Aneksa 10. Općeg okvirnog sporazuma za mir u Bosni i Hercegovini, namjerava donijeti odluku da se Javnom radiotelevizijskom servisu Bosne i Hercegovine (u daljnjem tekstu: BHRT) hitno dodijele sredstva u iznosu od 50 miliona konvertibilnih maraka od akumuliranog iznosa rezerve za poravnanje iz prihoda od akciza za putarine koje se nalaze na posebnom računu Centralne banke Bosne i Hercegovine, na isti način kako je 120 miliona konvertibilnih maraka dodijelio za izmirenje duga Republike Srpske u slučaju Vidauct d.o.o. Portorož?

Obrazloženje

Visoki predstavnik u Bosni i Hercegovini je dana 17. 7. 2025. godine, bez obzira na predviđenu namjenu prihoda od putarina propisanu članom 21. stav (3) Zakona o sistemu indirektnog oporezivanja u Bosni i Hercegovini, donio Odluku kojom je iznos od 120 miliona konvertibilnih maraka dodijeljen za izmirenje duga Republike Srpske u slučaju Vidauct d.o.o. Portorož, a isključivo u svrhu provođenja Odluke Međunarodnog centra za rješavanje investicionih sporova (ICSID) u predmetu br. ARB/16/36 - Viaduct d.o.o. Portorož.

U navedenoj Odluci visokog predstavnika se navodi da se pretpostavlja da iznos od 120 miliona KM, koji je neophodan za izvršenje, približno odgovara udjelu Republike Srpske u ovom prihodu, s čim se ne slažu brojni stručnjaci ekonomske struke. Dalje se navodi da, uvažavajući mogućnost da nakon što bude usvojena metodologija za raspodjelu prihoda od putarina, izmirenje obaveze Republike Srpske iz trenutno raspoloživih sredstava prihoda od putarina - koja obuhvataju udjele Federacije Bosne i Hercegovine, Republike Srpske i Brčko distrikta Bosne i Hercegovine - može dovesti do isplate iznosa koji je veći od iznosa na koji

Republika Srpska ima pravo. U tom slučaju, Republika Srpska ne bi dobila nikakve daljnje isplate iz ovog izvora sve dok eventualna potraživanja Federacije Bosne i Hercegovine ili Brčko distrikta Bosne i Hercegovine ne budu u potpunosti izmirena, u skladu s konačnim poravnanjem. Općepoznato je da je višak od 316 miliona KM nastao zbog odluke Upravnog odbora Uprave za indirektno oporezivanje da se od 90% prikupljenih sredstava od akciza za putarine raspoređuje privremeno na način da 59% pripada Federaciji Bosne i Hercegovine, 39% Republici Srpskoj i 2% Brčko Distriktu. Preostalih deset posto prikupljenih sredstava od putarine za puteve ostaje na podračunu Centralne banke Bosne i Hercegovine i to je iznos od 316 miliona KM.

Upravni odbor je bio obavezan da, u skladu s članom 21. Zakona o sistemu indirektnog oporezivanja, utvrdi konačnu metodologiju za raspodjelu ovih prihoda namijenjenih za izgradnju autoputeva u Bosni i Hercegovini, jer su gore navedeni koeficijenti privremeni. Međutim, opstrukcijom aktuelnog ministra finansija Bosne i Hercegovine Srđana Amidžića, koji je ujedno i predsjedavajući Upravnog odbora Uprave za indirektno oporezivanje Bosne i Hercegovine, te prethodnih godina drugih kadrova SNSD-a, konačna metodologija nikada nije utvrđena, jer ovakav način raspodjele neopravdano i ničim utemeljeno ide u korist Republike Srpske.

Član Upravnog odbora Uprave za indirektno oporezivanje iz reda eksperata Zijad Krnjić je javno objavio da bi po svim mogućim parametrima, pa tako i po krajnjoj potrošnji na osnovu koje se raspoređuju i druge akcize, kompletan iznos od putarina od 316 miliona KM morao pripasti Federaciji Bosne i Hercegovine, te da su građani Federacije Bosne i Hercegovine platitli dug Republike Srpske u slučaju Vijaduct.

Visoki predstavnik u Bosni i Hercegovini je donio Odluku kojom se dio od 316 miliona KM skupljenih od putarina sa posebnog računu Centralne banke Bosne i Hercegovine dodijeli za izmirenje duga Republike Srpske u slučaju Vijaduct d.o.o. Portorož, a radi se o iznosu od 120 miliona konvertibilnih maraka. Napominjem da, u skladu sa odlukama Upravnog odbora UIO od 2009. godine, Federaciji Bosne i Hercegovine nesporno pripada 59% akciza od putarina.

Smatram da je u gore spomenutoj Odluci Visoki predstavnik trebao obuhvatiti i Federaciju Bosne i Hercegovine te joj dodijeliti 181,5 milion KM skupljenih od putarina sa posebnog računu Centralne banke Bosne i Hercegovine. Naime, ako 120 miliona KM, koja su dodijeljena zbog duga Republike Srpske, iznosi 39% od 301,5 miliona KM koji se nalaze na podračunu Centralne banke, onda Federaciji Bosne i Hercegovine mora pripasti 181,5 miliona KM odnosno 59% od ukupno 301,5 miliona KM.

Zbog svih navedenih činjenica, postavljam pitanje visokom predstavniku u Bosni i Hercegovini gospodinu Christianu Schmidtu, da li će od iznosa od 181,5 miliona KM koji pripada Federaciji Bosne i Hercegovine, u skladu sa svojim ovlastima, hitno donijeti odluku o dodijeli sredstava Javnom radiotelevizijskom servisu Bosne i Hercegovine (BHRT) u iznosu od 50 miliona konvertibilnih maraka od akumuliranog iznosa rezerve za poravnanje iz prihoda od akciza za putarine koje se nalaze na posebnom računu Centralne banke Bosne i Hercegovine?

Činjenica je da se BHRT nalazi u krajnje složenoj i teškoj finansijskoj situaciji, ali ne primarno svojom krivicom. Ovakva situaciju je rezultat dugogodišnjeg neprovođenja i kršenja zakonskih odredbi Zakona o javnom radiotelevizijskom sistemu Bosne i Hercegovine.

Od 2017. godine Radiotelevizija Republike Srpske je, jednostranom odlukom i suprotno Zakonu, prestala uplaćivati sredstva od RTV takse na jedinstveni račun, čime je narušen sistem raspodjele finansijskih sredstava prikupljenih naplatom RTV takse, čime je BHRT-u uskraćen stabilan način finansiranja. Dug RTRS-a prema BHRT-u trenutno iznosi 102 miliona KM i neizvjesno je kada će ovaj dug sudskim putem biti naplaćen.

BHRT-u prijeti stečaj zbog nagomilanih dugova, a zbog duga prema Evropskoj radiodifuznoj uniji (EBU), koji iznosi ukupno 21,2 miliona KM, Izvršni odbor EBU je donio odluku da će, ukoliko dug ne bude izmiren do 26. februara 2026. godine, blokirati račun BHRT-a i pristupiti prodaji njene pokretne i nepokretne imovine.

Također, važno je istaći da se RTV taksa naplaćuje samo na jednom dijelu Federacije i to putem Elektoprivrede Bosne i Hercegovine, dok se u kantonima, koje električnom energijom snabdijeva Elektroprivreda HZHB, taksa uopće ne naplaćuje od 2015. godine.

Apsurdno je da godinama visoki zvaničnici HDZ-a, poput aktuelne predsjedavajuće Vijeća ministara Bosne i Hercegovine Borjane Krišto, javno pozivaju građane da ne plaćaju RTV taksu. Paradoksalno je da se Borjana Krišto susreće sa međunarodnim zvaničnicima i govori o vladavini prava, a 2017. godine je izjavila sljedeće, citiram: „Ostajem pri svom mišljenju da Hrvati u Bosni i Hercegovini ne trebaju plaćati RTV pristojbu dok se pitanje javnih emitera u Bosni i Hercegovini sustavno ne riješi“.

Zbog dugogodišnjeg neplaćanja RTV takse građana koji žive u kantonima sa hrvatskom većinom, BHRT i Federalna televizija su oštećeni za najmanje 110 miliona KM i ova sredstava su nepovratno izgubljena.

Pored navedenog, strateški partneri SNSD i HDZ, nastavili su udruženi administrativni poduhvat na urušavanju BHRT-a, uskraćujući 22 miliona KM koja su bila predložena u Budžetu Bosne i Hercegovine. Po istoj matrici uskratili su i sredstava za sedam institucija kulture, uprkos odluci visokog predstavnika kojom je jasno utvrđeno da država Bosna i Hercegovina osnivač ovih institucija i da mora osigurati njihovo finansiranje.

Podsjećam da je osiguranje finansijske održivosti javnih RTV servisa, pa tako i BHRT-a, jedan je od 14 ključnih prioriteta iz Mišljenja Evropske komisije koji Bosna i Hercegovina mora ispuniti da bi otvorila pregovore o pristupanju Evropskoj uniji.

S poštovanjem,

ZASTUPNIK PS BiH
Šemsudin Mehmedović

